



**GAZETI RASMI LA SERIKALI YA  
MAPINDUZI YA ZANZIBAR**

*(Hupigwa Chapa kwa Amri ya Serikali)*

Sehemu ya CXXXIII Nam. 7209

23 Januari, 2024

Bei, Shs. 4,000/=

*Imekubaliwa na Mkuu wa Posta kuwa ni Gazeti*

**YALIYOMO**

*Ukurasa*

Mswada wa Sheria ya Kurekebisha Sheria  
Mbali Mbali na Kuweka Masharti Bora  
Ndani yake ..... 42

**SEHEMU YA SHERIA**

Tangazo la Mswada lililotajwa hapo chini linatangazwa katika  
***Gazeti Rasmi*** hili.

**Tangazo la Mswada**

Nam. : Mswada wa Sheria ya Kurekebisha Sheria Mbali Mbali na Kuweka  
Masharti Bora Ndani yake.

**TANGAZO**

Mswada ufuatao utawasilishwa katika Mkutano wa Baraza la  
Wawakilishi utakaoanza tarehe 14 Februari, 2024 kwa kusomwa mara ya  
kwanza na unachapishwa pamoja na Madhumuni na Sababu zake kwa ajili  
ya kutoa taarifa kwa wananchi.

**ZANZIBAR**  
23 Januari, 2024

(Mhandisi Zena Ahmed Said)  
***Katibu wa Baraza la Mapinduzi na  
Katibu Mkuu Kiongozi.***

**MSWADA**  
**wa**  
**SHERIA YA MAREKEBISHO YA SHERIA MBALI MBALI**  
**NA KUWEKA MASHARTI BORA NDANI YAKE**

**IMETUNGWA** na Baraza la Wawakilishi Zanzibar.

**SEHEMU YA KWANZA**  
**MASHARTI YA AWALI**

Jina fupi  
na kuanza  
kutumika.

**1.** Sheria hii itajulikana kama Sheria ya Marekebisho ya Sheria Mbali Mbali, 2024 na itanza kutumika mara baada ya kutiwa saini na Rais.

Mareke-  
bisho ya  
Sheria  
mbali-  
mbali.

**2.** Sheria zilizotajwa katika sehemu mbali mbali za Sheria hii zinarekebishwa kwa namna zilizyoainishwa katika sehemu husika.

**SEHEMU YA PILI**  
**MAREKEBISHO YA SHERIA YA AFISI YA MWANASHERIA**  
**MKUU (UTEKELEZAJI WA MAJUKUMU), NAM. 6 YA 2013**

Kusomwa.

**3.** Sehemu hii itasomwa pamoja na Sheria ya Afisi ya Mwanasheria Mkuu (Utekelezaji wa Majukumu), Nam. 6 ya 2013 ambapo katika Sehemu hii itajulikana kama “Sheria Mama”.

Mareke-  
bisho ya  
kifungu  
cha 3.

**4.** Kifungu cha 3 cha Sheria Mama kinarekebishwa katika ufafanuzi wa neno “huduma za kisheria” kwa kuingiza maneno “mapitio ya sheria” baina ya maneno “uandishi wa sheria” na “na nyengine”.

Mareke-  
bisho ya  
kifungu  
cha 14.

**5.** Kifungu cha 14 cha Sheria Mama kinarekebishwa katika kifungu kidogo cha (1) kwa:

(a) kuingiza aya mpya (m), (n), (o), (p), (q) na (r) mara baada ya aya (l) kama ifuatavyo:

“(m) kuchukua na kufanya mapitio ya sheria za Zanzibar kwa lengo la kuziendeleza na kurekebisha mifumo yake;

(n) kuzifanya sheria za Zanzibar katika lugha nyepesi;

(o) kuandaa na kuwasilisha kwa Serikali programu ya uchunguzi wa sheria mbalimbali kwa lengo la kuzibadilisha sheria hizo kila baada ya muda, ikijumuisha mapendekezo;

(p) kuanzisha mfumo kwa ajili ya kupata taarifa yoyote inayohusiana na mifumo ya sheria ya nchi nyengine ambayo inaweza kuwezesha utekelezaji wa kazi zake;

(q) kuchapisha au kuwezesha uchapishaji wa mambo yanayohusiana na sheria au mambo mengine yanayohusika; na

(r) kuitisha, kuwezesha au kushajihisha uandaji wa semina, mafunzo, mihadhara na mikutano mengine ya umma kwa madhumuni ya usambazaji wa taarifa au mambo yanayohusiana na mabadiliko ya sheria kwa Zanzibar.”

(b) kuzipa nambari upya aya zilizobaki kwa mpangilio wake.

6. Sheria Mama inarekebishwa kwa kuongeza vifungu vipya vya 23A na 23B mara baada ya kifungu cha 23 kama ifuatavyo:

Kuongeza  
vifungu  
vipya vya  
23A na  
23B.

“Afisi  
kushirikisha  
umma  
katika kufanya  
mapitio ya  
sheria.

**23A.**-(1) Afisi inaweza, katika kufanya uchunguzi wa jambo lolote, kupanga kazi zake kwa lengo la kuiwezesha kutoa elimu kwa umma juu ya masuala yanayohusiana na jambo hilo na kupata maoni ya idadi kubwa ya wananchi wa Zanzibar katika masuala husika.

(2) Kwa madhumuni ya kuendana na masharti ya kifungu kidogo cha (1) cha kifungu hiki, Afisi inaweza kufanya jambo lolote ambalo ni muhimu ili kufanikisha ushiriki wa umma katika kazi za Afisi na inaweza:

- (a) kuandaa na kufanya semina kwa ajili ya majadiliano ya masuala ya umma yanayohusiana na jambo linalokusudiwa;
- (b) kupanga mafunzo yatakayotolewa na Afisi kwa ajili ya umma;
- (c) kuitisha na kushajihisha mijadala ya wazi kupitia Afisi au vyombo vya habari;
- (d) kuanzisha na kuchapisha jarida au machapisho mengine kwa madhumuni ya kusambaza taarifa juu ya mabadiliko ya sheria; na
- (e) kufanya jambo lolote ambalo ni muhimu kwa madhumuni ya kutangaza mapendekezo ya mabadiliko ya sheria na kupata uelewa wa wananchi na majibu yao.

Mambo ya  
kuzingatia  
wakati wa  
mapitio ya  
sheria.

**23B.**-(1) Afisi itazingatia mahitaji ya kuwa na sheria ambazo zipo kwa mujibu wa sera na mikakati ya kitaifa.

(2) Afisi itazingatia na kutoa mapendekezo kwa ajili ya mabadiliko ya sheria kwa lengo la kuhakikisha kuwa sheria za Zanzibar zinatungwa kwa ajili ya:

- (a) kukuza na kuongeza wigo wa misingi mikuu ya haki za binadamu kama ilivyoainishwa katika Katiba ya Jamhuri ya Muungano wa Tanzania ya 1977 na Katiba ya Zanzibar ya 1984;

- (b) kukuza na kulinda mila, maadili na imani za watu wa Zanzibar ambazo zinafaa kutumika kulingana na maendeleo ya kisasa ya mawazo ya kisheria;
- (c) kukuza na kuhakikisha heshima ya utawala wa sheria;
- (d) kuhakikisha maendeleo ya mfumo wa haki kwa ajili ya utoaji haki sawa na ulinzi bora wa mali ya jamii na mtu binafsi ya watu wa Zanzibar; na
- (e) kukuza na kuimarisha heshima kwa haki za binadamu na watu wote katika mwenendo wao au biashara rasmi na masuala binafsi.”

Kuongeza  
kifungu  
kipya cha  
31A.

**7.** Sheria Mama inarekebishwa kwa kuongeza kifungu kipya cha 31A mara baada ya kifungu cha 31 kama ifuatavyo:

“Kufuta na  
kubakiza.

**31A.**-(1) Sheria ya Tume ya Kurekebisha Sheria Zanzibar, Nam. 16 ya 1986 inafutwa.

(2) Bila ya kujali masharti ya kifungu kidogo cha (1) cha kifungu hiki;

- (a) jambo lolote ambalo halijakamilika chini ya Sheria iliyofutwa litaendelea na kukamilishwa chini ya masharti ya Sheria hii; na
- (b) wafanyakazi, mali na madeni chini ya Sheria iliyofutwa, yanahamishiwa kwa Afisi.”

#### SEHEMU YA TATU

#### MAREKEBISHO YA SHERIA YA MAMLAKA YA KUDHIBITI NA KUPAMBANA NA DAWA ZA KULEVYA, NAM. 8 YA 2021

Kusomwa.

**8.** Sehemu hii itasomwa pamoja na Sheria ya Mamlaka ya Kudhibiti na Kupambana na Dawa za Kulevya, Nam. 8 ya 2021 ambapo katika Sehemu hii itajulikana kama “Sheria Mama”.

Mareke-  
bisho ya  
kifungu  
cha 2.

**9.** Kifungu cha 2 cha Sheria Mama kinarekebishwa kwa kufuta aya ya (a) katika ufafanuzi wa neno “Mahakama yenye uwezo” na kuweka badala yake aya mpya ya (a) kama ifuatavyo:

“(a) kuhusiana na makosa chini ya vifungu vya 21, 22, 30 na 38 ni Mahakama Kuu.”

Mareke-  
bisho ya  
kifungu  
cha 16.

**10.** Kifungu cha 16 cha Sheria Mama kinarekebishwa kwa kuongeza maneno “au faini inayolipwa kutokana na adhabu iliyotolewa na Mahakama baina ya maneno “iliyofilisiwa” na “chini” katika kifungu kidogo cha (2) (c).

**11.** Kifungu cha 19 cha Sheria Mama kinarekebishwa kwa kuongeza maneno “na katika mazingira yoyote kifungo kisichopungua miaka thelathini” mwishoni mwa kifungu.

Marekebisho ya kifungu cha 19.

**12.** Kifungu cha 21 cha Sheria Mama kinarekebishwa katika kifungu kidogo cha (1) kwa kuongeza maneno “na katika mazingira yoyote kifungo kisichopungua miaka thelathini” mwishoni mwa kifungu kidogo.

Marekebisho ya kifungu cha 21.

**13.** Kifungu cha 22 cha Sheria Mama kinarekebishwa kwa kuongeza maneno “na katika mazingira yoyote kifungo kisichopungua miaka thelathini” mwishoni mwa kifungu.

Marekebisho ya kifungu cha 22.

**14.** Kifungu 23 cha Sheria Mama kinarekebishwa kwa:

Marekebisho ya kifungu cha 23.

(a) kufuta kifungu kidogo cha (1) na kuweka badala yake kifungu kidogo cha (1) kipyaa kama ifuatavyo:

“(1) Mtu ambaye atakuwa na kiwango kidogo cha aina yoyote za dawa za kulevya ambacho hakijaidhinishwa na daktari kwa ajili ya sababu za kimatibabu, ametenda kosa na akitiwa hatiani, ikiwa dawa za kulevya zinazohusishwa:

(a) ni zile zilizotajwa katika Sheria hii au dawa ya kulevya yoyote nyengine au saikotrik iliyoainishwa na Waziri kwa tangazo lililochapishwa katika Gazeti Rasmi, atalipa faini isiyopungua Shilingi Milioni Tatu na isiyozidi Shilingi Milioni Tano au kifungu cha mwaka mmoja au adhabu zote faini na kifungu; au

(b) mbali na zile zilizelezwa chini ya aya (a) ya kifungu hiki, atalipa faini isiyopungua Shilingi Milioni Moja na isiyozidi Shilingi Milioni Tatu au kifungu cha mwaka mmoja au adhabu zote faini na kifungu.”

(b) kufuta vifungu vidogo vya (2) na (3).

(c) kukipa nambari upya kifungu kidogo cha (4) kuwa (2).

**15.** Kifungu cha 30 cha Sheria Mama kinarekebishwa kwa kuingiza maneno “na katika mazingira yoyote kifungo kisichopungua miaka thelathini” baada ya maneno “kifungu cha maisha”.

Marekebisho ya kifungu cha 30.

**16.** Kifungu cha 37 cha Sheria Mama kinarekebishwa kwa kuingiza “19” baina ya maneno “vifungu vya” na “21” katika kifungu kidogo cha (1)(d).

Marekebisho ya kifungu cha 37.

**17.** Sheria Mama inarekebishwa kwa kuongeza kifungu kipyaa cha 41A mara baada ya kifungu cha 41 kama ifuatavyo:

Kuongeza kifungu kipyaa cha 41A.

“Uwezo wa kupekua.

**41A.**-(1) Bila ya kuathiri masharti ya kibali cha upekuzi yaliyomo kwenye Sheria ya Mwenendo wa Makosa ya Jinai, Nam. 7 ya 2018, Kamishna Mkuu au afisa aliyeidhinishwa anaweza kupekua au kutoa idhini ya maandishi kwa afisa aliye chini ya usimamizi wake kupekua jengo kama hali itakavyokuwa, endapo ameridhika kuwa kuna sababu za msingi za kuamini kwamba katika jengo hilo kuna kitu chochote:

- (a) kinachohusiana na tuhuma za kosa linalohusiana na dawa za kulevya;
- (b) ambacho kwa sababu za msingi itapelekea kupatikana ushahidi wa uhalifu kwa kosa linalohusiana na dawa za kulevya; au
- (c) kinakusudiwa kutumika kwa madhumuni ya kutenda uhalifu wa kosa linalohusiana na dawa za kulevya na Kamishna Mkuu au afisa aliyeidhinishwa ameridhika kwamba ucheleweshaji wowote utapelekea kuondosha, kuharibu kitu hicho au kupoteza ushahidi.

(2) Endapo idhini yoyote chini ya kifungu kidogo cha (1) cha kifungu hiki imetolewa, afisa anayehusika, kwa haraka iwezekanavyo, atatoa taarifa kwa Hakimu juu ya utolewaji na sababu zilizopelekea kutolewa idhini hiyo na matokeo ya upekuzi wowote uliofanywa chini ya idhini hiyo.”

Marekebisho ya kifungu cha 42.

**18.** Kifungu cha 42 cha Sheria Mama kinarekebishwa katika kifungu kidogo cha (2) kwa kuingiza maneno “wa jengo” baina ya maneno “upekuzi” na “atawashirikisha”.

Marekebisho ya kifungu cha 43.

**19.** Kifungu cha 43 cha Sheria Mama kinarekebishwa kwa kufuta maneno “kama ilivyoainishwa katika Jadweli la Nne la Sheria hii” mwisho wa kifungu kidogo cha (5).

Marekebisho ya kifungu cha 46.

**20.** Kifungu cha 46 cha Sheria Mama kinarekebishwa katika kifungu kidogo cha (2) kwa kufuta aya ya (k) na kuweka badala yake aya ya (k) mpya kama ifuatavyo:

“(k) ataandika au atasababisha kuandikwa maelezo ya mtu anayetuhumiwa kumeza aina yoyote ya dawa za kulevya yanayothibitisha usahihi wa maelezo kama ilivyoainishwa katika Fomu Nam. ZDCEA 005 chini ya Jadweli la Tano la Sheria hii.”

Marekebisho ya kifungu cha 48.

**21.** Kifungu cha 48 cha Sheria Mama kinarekebishwa kwa:

- (a) kufuta aya ya (c) na kuweka badala yake aya ya (c) mpya kama ifuatavyo:

“(c) kutomzuia mtu kwa muda unaozidi saa arobaini na nane isipokuwa ombi la kuongeza muda limefanywa katika Mahakama na kukubaliwa.”

(b) kufuta aya ya (g) na kuweka badala yake aya ya (g) mpya kama ifuatavyo:

“(g) atachukua maelezo na kutoa risiti ya kutunza mali iliyokamatwa ya mtuhumiwa akiwa mahabusu.”

**22.** Kifungu cha 50 cha Sheria Mama kinarekebishwa katika kifungu kidogo cha (1) kwa kufuta aya ya (d). Marekebisho ya kifungu cha 50.

**23.** Kifungu cha 61 cha Sheria Mama kinarekebishwa katika kifungu kidogo cha (1) kwa kufuta aya ya (b) na kuweka badala yake aya ya (b) mpya kama ifuatavyo: Marekebisho ya kifungu cha 61.

“(b) anamwachia au anasababisha mtu ambaye amekamatwa, anatumiziwa, anashikiliwa au yupo chini ya uangalizi wa Mamlaka kutoroka.”

**24.** Sheria Mama inarekebishwa kwa kufuta kifungu cha 72 na kuweka badala yake kifungu cha 72 kipyaa kama ifuatavyo: Kufuta na kuweka badala yake kifungu kipyaa cha 72.

“Kusitishwa kwa akaunti ya benki.

**72.-(1)** Kamishna Mkuu, katika kutekeleza kazi chini ya Sheria hii, atakuwa na uwezo wa kusitisha kwa muda matumizi ya akaunti ya benki yoyote kupisha uchunguzi wa kosa lolote chini ya Sheria hii.

(2) Mtu ambaye anakiuka au anashindwa kufuata amri ya kusitisha akaunti chini ya kifungu hiki, ametenda kosa.”

**25.** Sheria Mama inarekebishwa kwa kuongeza kifungu kipyaa cha 76A mara baada ya kifungu cha 76 kama ifuatavyo: Kuongeza kifungu kipyaa cha 76A.

“Matumizi ya Sheria ya Utakatishaji wa Fedha Haramu na Mapato Yatokanayo na Uhalifu, Nam. 10 ya 2009.

**76A.** Bila ya kujali masharti chini ya Sheria hii, masharti ya Sehemu ya Nne, Tano na Sita ya Sheria ya Utakatishaji wa Fedha Haramu na Mapato Yatokanayo na Uhalifu, Nam. 10 ya 2009 yanaweza kutumika pamoja na mabadiliko muhimu kuhusiana na utafishaji chini ya Sheria hii.”

**26.** Jadweli la Tano la Sheria Mama linarekebishwa kwa kufuta kichwa cha habari “CHETI KINACHOTHIBITISHA USAHIHI WA MAELEZO” na kuweka badala yake kichwa cha habari kipyaa “MAELEZO YA MTUHUMIWA ALIYEMEZA DAWA ZA KULEVYA.” Marekebisho ya Jadweli la Tano.

**SEHEMU YA NNE  
MAREKEBISHO YA SHERIA YA SHIRIKA LA MAWASILIANO  
ZANZIBAR, NAM. 4 YA 2023**

Kusomwa. **27.** Sehemu hii itasomwa pamoja na Sheria ya Shirika la Mawasiliano Zanzibar, Nam. 4 ya 2023 ambapo katika Sehemu hii itajulikana kama “Sheria Mama”.

Mareke-  
bisho ya  
kifungu  
cha 3. **28.** Kifungu cha 3 cha Sheria Mama kinarekebishwa katika ufafanuzi wa maneno “Miundombinu ya Kimkakati ya TEHAMA” kwa kuongeza neno “Taifa” kabla ya neno “taarifa”.

**SEHEMU YA TANO  
MAREKEBISHO YA SHERIA YA KIKOSI MAALUM CHA  
KUZUIA MAGENDO, NAM. 1 YA 2003**

Kusomwa. **29.** Sehemu hii itasomwa pamoja na Sheria ya Kikosi Maalum cha Kuzuia Magendo, Nam. 1 ya 2003 ambapo katika Sehemu hii itajulikana kama “Sheria Mama”.

Mareke-  
bisho ya  
kifungu  
cha 4. **30.** Kifungu cha 4 cha Sheria Mama kinarekebishwa katika kifungu kidogo cha (1) kwa:

(a) kuingiza aya mpya ya (k), (l), (m) na (n) mara baada ya aya ya (j) kama ifuatavyo:

“(k) kufanya shughuli za kiuchumi, biashara na uwekezaji kwa mujibu wa sheria;

(l) kufanya ukaguzi wa vyombo vya usafiri bandarini na baharini endapo kuna taarifa zinazoshukiwa kuhusiana na magendo;

(m) kutoa msaada kwa taasisi yoyote kuhusiana na kazi za KMKM; na

(n) kutoa mafunzo kwa jamii kuhusiana na kazi zinazotekelezwa na KMKM.”

(b) kuibadilisha aya ya (k) na kuwa aya ya (o).

**SEHEMU YA SITA  
MAREKEBISHO YA SHERIA YA KIKOSI CHA  
VALANTIA, NAM. 5 YA 2004**

Kusomwa. **31.** Sehemu hii itasomwa pamoja na Sheria ya Kikosi cha Valantia, Nam. 5 ya 2004 ambapo katika Sehemu hii itajulikana kama “Sheria Mama”.

Mareke-  
bisho ya  
kifungu  
cha 4. **32.** Kifungu cha 4 cha Sheria Mama kinarekebishwa kwa:



(a) kuingiza aya mpya ya (e) kama ifuatavyo:

“ (e) kufanya shughuli za kiuchumi, biashara na uwekezaji kwa mujibu wa sheria;”

(b) kuzibadilisha aya ya (e) na (f) kuwa (f) na (g).

**33.** Kifungu cha 25 cha Sheria Mama kinarekebishwa katika aya ya (e) kwa kufuta maneno “ishirini na moja” baina ya maneno “zaidi ya” na “siku” na kuweka badala yake neno “thelathini”. Mareke-bisho cha kifungu cha 25.

**SEHEMU YA SABA  
MAREKEBISHO YA SHERIA YA WAKALA WA UWEZESHAJI  
WANANCHI KIUCHUMI ZANZIBAR, NAM. 2 YA 2022**

**34.** Sehemu hii itasomwa pamoja na Sheria ya Wakala wa Uwezeshaji Wananchi Kiuchumi Zanzibar, Nam. 2 ya 2022 ambapo katika Sehemu hii itajulikana kama “Sheria Mama”. Kusomwa.

**35.** Kifungu cha 2 cha Sheria Mama kinarekebishwa kwa kuingiza maneno mapya ya ufafanuzi katika mpangilio wake wa kialfabeti kama ifuatavyo: Mareke-bisho ya kifungu cha 2.

“mradi” maana yake ni mradi ulioanzishwa au unaoendeshwa na kikundi cha watu, mtu binasfi au taasisi ambayo inafanya biashara, au inazalisha bidhaa inatoa huduma kwa ajili ya kupata faida;

“mradi wa kati” maana yake ni mradi wowote wenye jumla ya rasilimali zenye thamani isiyopungua Shilingi Milioni Hamsini na Saba and isiozidi Shilingi Milioni Sita na Hamsini au una wafanyakazi wasiopungua ishirini na wasiozidi tisini na tisa;

“mradi mdogomdogo” maana yake ni mradi wowote wenye jumla rasilimali zenye thamani isiozidi Shilingi Milioni Kumi na Moja au una wafanyakazi wasiozidi wanne;

“mradi mdogo” maana yake ni mradi wowote wenye jumla ya rasilimali zenye thamani inayozidi Shilingi Milioni Kumi na Moja na isiozidi Shilingi Milioni Hamsini na Saba au una wafanyakazi wasiopungua watano na wasiozidi kumi na tisa;

**36.** Kifungu cha 6 cha Sheria Mama kinarekebishwa kwa:

(a) kuingiza aya mpya ya (t), (u), (v) na (w) mara baada ya aya ya (s) kama ifuatavyo:

“(t) kuimarisha uwezo kwa kuwapatia wahusika wa miradi hiyo misaada ya kiufundi wa kushindana wa bidhaa za miradi ya Viwanda Vidogo vidogo, Vidogo na vya Kati;

Mareke-bisho cha kifungu cha 6.

- (u) kuwezesha miradi ya Viwanda Vidogo Vidogo, Vidogo na vya Kati kupata vifaa mwafaka vya kufanyia kazi zao ama kwa njia ya kununua, kukodi au kwa makaubaliano ya kibiashara;
- (v) kuratibu, kuoainisha na kuwezesha shughuli, miradi na mipango ya pamoja ya maendeleo ya taasisi mbalimbali za umma na za binafsi kuhusiana na miradi ya Viwanda Vidogo Vidogo, Vidogo na vya Kati;
- (w) kupendekeza kwa Waziri vivutio vitakavyoshajihisha uanzishwaji na uwezesaji wa mazingira ya kuvilinda Viwanda Vidogo Vidogo, Vidogo na vya Kati;”

(b) kuibadilisha aya ya (t) na kuwa aya ya (x).

Mareke-  
bisho ya  
kifungu  
cha 42.

**37.** Kifungu cha 42 cha Sheria Mama kinarekebisha kwa kufuta vifungu vidogo vya (2) na (3) na kuweka badala yake vifungu vidogo vipya vya (2) na (3) kama ifuatavyo:

“(2) Sheria ya Wakala wa Maendeleo ya Viwanda Vidogo Vidogo, Vidogo na vya Kati, Nam. 2 ya 2018 inafutwa.

(3) Bila ya kujali masharti chini ya vifungu vidogo vya (1) na (2) vya kifungu hiki, jambo lolote lililofanywa au kukusudiwa kufanywa chini ya Tangazo la Kisheria Nam. 114 la 2015 na Sheria ya Wakala wa Maendeleo ya Viwanda Vidogo Vidogo, Vidogo na vya Kati, Nam. 2 ya 2018 kabla ya kuanza kutumika kwa Sheria hii litaendelea kuwa halali na kuchukuliwa kuwa limefanywa chini ya masharti ya Sheria hii.”

## MADHUMUNI NA SABABU

---

Madhumuni ya Mswada huu ni kupendekeza marekebisho ya Sheria mbali mbali. Marekebisho yaliyopendekezwa ni kwa ajili ya kuondoa changamoto zinazojitokeza katika utekelezaji wa Sheria hizo. Katika utekelezaji wa sheria zilizomo katika Mswada huu, imeonekana wazi kuwa zinahitaji kufanyiwa marekebisho ili kuondokana na changamoto zinazozipata taasisi mbali mbali za Serikali katika maeneo mbalimbali. Hivyo, Serikali imeamua kupendekeza marekebisho yafuatayo katika sheria hizo kwa lengo la kuhakikisha utekelezaji bora wa madhumuni ya sheria hizo.

Mswada huu umegawika katika Sehemu Saba.

***Sehemu ya Kwanza*** inaeleza Masharti ya awali ikijumuisha jina fupi na kuanza kutumika na marekebisho ya Sheria mbali mbali.

***Sehemu ya Pili*** inahusu marekebisho ya Sheria ya Afisi ya Mwanasheria Mkuu (Utekelezaji wa Majukumu), Nam. 6 ya 2013. Sehemu hii inakusudia kufanya marekebisho katika vifungu vya 3, 14, 23 na 31 kwa lengo la kuiunganisha Tume ya Kurekebisha Sheria na Afisi ya Mwanasheria Mkuu kama ilivyoelekezwa na Serikali. Hivyo, kutokana na marekebisho hayo, Sheria ya Tume ya Kurekebisha Sheria inafutwa.

***Sehemu ya Tatu*** inahusu marekebisho ya Sheria ya Mamlaka ya Kudhibiti na Kupambana na Dawa za Kulevya, Nam. 8 ya 2021. Sheria hii inapendekezwa kufanyiwa marekebisho kwa lengo la kuondoa changamoto zinazojitokeza katika utekelezaji wa Sheria hiyo na kuweka utaratibu mzuri wa kushughulikia makosa yanayohusiana na dawa za kulevya.

***Sehemu ya Nne*** inahusu marekebisho ya Sheria ya Shirika la Mawasiliano Zanzibar, Nam. 4 ya 2023. Sehemu hii inarekebisha kifungu cha 3 katika ufafanuzi wa neno “Miundombinu ya Kimkakati ya TEHAMA” ili kondoa utata wa matumizi ya neno hilo.

***Sehemu ya Tano*** inahusu marekebisho ya Sheria ya Kikosi Maalum cha Kuzuia Magendo, Nam. 1 ya 2003 ambapo marekebisho yanafanywa katika kifungu cha 4 ili kuiwezesha KMKM kufanya shughuli za kiuchumi, biashara na uwekezaji kama ilivyoagizwa na Serikali.

***Sehemu ya Sita*** inarekebisha Sheria ya Kikosi cha Valantia, Nam. 5 ya 2004. Marekebisho yamefanywa katika kifungu cha 4 kwa ajili ya kukipa uwezo Kikosi cha Valantia kufanya shughuli za kiuchumi, biashara na uwekezaji kwa lengo la kutekeleza agizo la Serikali. Aidha, Sheria inarekebisha katika kifungu cha 25 ili kuendana na taratibu zilizokuwepo.

***Sehemu ya Saba*** inaeleza marekebisho ya Sheria ya Wakala wa Uwezesaji Wananchi Kiuchumi Zanzibar, Nam. 2 ya 2022. Sheria hii inarekebisha kwa kuunganisha Taasisi ya Wakala wa Maendeleo ya Viwanda Vidogo Vidogo, Vidogo na vya Kati Zanzibar na Wakala wa Uwezesaji Wananchi Kiuchumi Zanzibar kwa lengo la kutekeleza agizo

la Serikali. Aidha, kufuatia marekebisho hayo, Sheria ya Wakala wa Maendeleo ya Viwanda Vidogo Vidogo, Vidogo na vya Kati Zanzibar, Nam. 2 ya 2018 inafutwa.

**ZANZIBAR.**  
23 Januari, 2024

(DKT. MWINYI T. HAJI)  
**MWANASHERIA MKUU**  
**ZANZIBAR**